



Sud Bosne i Hercegovine
Суд Босне и Херцеговине

Broj: S1 3 IŽ 043959 22 IŽ
Sarajevo, 26.09.2022. godine

Sud Bosne i Hercegovine, u vijeću Apelacionog odjeljenja sastavljenom od sudija Srete Crnjak, predsjednika vijeća, Dinke Bešlagić-Čovrk i Vesne Trifunović, članova vijeća, odlučujući o žalbi političke stranke Socijalistička partija-SP, Jovana Dučića 25, Banja Luka, izjavljenoj protiv Odluke Centralne izborne komisije Bosne i Hercegovine, broj 05-1-07-5-3952/22 od 14.09.2022. godine, u predmetu vođenja plaćene političke kampanje prije službenog početka izborne kampanje, u nejavnoj sjednici, održanoj dana 26.09.2022. godine, donio je

R J E Š E N J E

Žalba se odbija.

O b r a z l o ž e n j e

Odlukom Centralne izborne komisije Bosne i Hercegovine, broj i datum navedeni u uvodu, utvrđeno je da je Politička stranka Socijalistička partija – SP odgovorna što je Željko Babić, kandidat ove političke stranke za Narodnu Skupštinu Republike Srpske, na svom Fejzbuk profilu, dana 20.08.2022. godine, vodio plaćenu izbornu kampanju prije službenog početka izborne kampanje, odnosno vršio političko javno oglašavanje, pa joj je izrečena novčana kazna u iznosu od 3.000,00 KM.

Protiv navedene odluke žalbu je izjavila politička stranka Socijalistička partija zbog nepotpuno i nepravilno utvrđenog činjeničnog stanja i pogrešne primjene materijalnog prava. U žalbi navodi da je konkretna radnja zbog koje je izrečena novčana kazna učinjena od strane Željka Babića, a ne političkog subjekta, te da Željko Babić nije kandidat predložen ispred Socijalističke partije već od strane Koalicije Socijalistička partija Petar Đokić – NDP-SNP, koji ima svoj subjektivitet, a ne Socijalistička partija, te u tom smislu ne postoji pasivni legitimitet za kažnjavanje Socijalističke partije. Predlaže da sud poništi i pobijnu odluku stavi van snage.

Centralna izborna komisija Bosne i Hercegovine dostavila je ovom sudu odgovor na žalbu u kojem je predložila da se izjavljena žalba odbije kao neosnovana.

Ispitujući pobijanu odluku u okviru žalbenih navoda, apelaciono vijeće je odlučilo kao u izreci iz sljedećih razloga:

Žalba nije osnovana.

Iz stanja spisa proizilazi da je Centralna izborna komisija Bosne i Hercegovine dana 26.08.2022. godine, zaprimila informaciju od Transparency International Bosne

i Hercegovine u kojoj se navodi da je kandidat političke stranke Socijalističke partije Željko Babić, izvršio plaćanje sponzorisanе objave putem društvene mreže Facebook u zakonom zabranjenom periodu, te da je na taj način ova politička stranka postupila suprotno odredbama člana 16.14 stav (3) Izbornog zakona Bosne i Hercegovine. Uz informaciju je priložen i screenshot (snimak) sponzorisanih objava.

Centralna izborna komisija Bosne i Hercegovine je, imajući u vidu odredbu člana 6.2 stav (1) Izbornog zakona Bosne i Hercegovine, u postupku ispitivanja formalno pravne strane podneska utvrdila da je isti dopušten, ali da je podnesen od neovlaštenog lica iz kojih razloga je u smislu člana 6.2 stav (2) i (3) Izbornog zakona Bosne i Hercegovine predmetni podnesak cijenila kao inicijativu za pokretanje postupka i postupak vodila po službenoj dužnosti.

Nadalje, postupajući po navedenoj inicijativi, Centralna izborna komisija Bosne i Hercegovine je, u skladu sa zakonskom procedurom, aktom broj: 05-1-07-5-149-2/22 od 29.08.2022. godine zatražila izjašnjenje na predmetnu objavu od političke stranke i kandidata Željka Babića.

Socijalistička partija se nije izjasnila na navedenu inicijativu dok je njen kandidat Željko Babić u svom izjašnjenju naveo da je sa svoje Facebook stranice uklonio sve informacije koje bi mogle biti u suprotnosti sa odredbom navedenog člana. Slogan „Za bolju Srpsku“ u trenutku objave i nije bio zvanični slogan njegove političke stranke niti je na taj način mogao uticati na glasačko tijelo.

S obzirom na ovako utvrđeno činjenično stanje, po ocjeni suda, Centralna izborna komisija Bosne i Hercegovine je pravilno zaključila da je sponzorisana objava postavljena od strane Željka Babića, kao i da je politička stranka Socijalistička partija – SP odgovorna za kršenje odredbe člana 16.14 stav (3) Izbornog zakona Bosne i Hercegovine, jer je Željko Babić, kandidat ove političke stranke, na svom Facebook profilu vodio plaćenu izbornu kampanju prije službenog početka izborne kampanje.

Naime, iz teksta navedene objave koja glasi: „Za bolju Srpsku!“ proizilazi da sponzorisana objava u svom opisu i sadržaju pokazuje promociju ove političke stranke i njega kao kandidata i to u periodu kada je zabranjeno vođenje plaćene izborne kampanje i plaćenog javnog oglašavanja u smislu člana 16.14 stav (3) Izbornog zakona BiH, kod nesporne činjenice da je Željko Babić aktuelni poslanik Narodne Skupštine Republike Srpske koji je i kandidat političke stranke Socijalistička partija – SP na predstojećim Opštim izborima 2022. godine, s obzirom da je kao kandidat predložen ispred ove političke stranke i tako takav ovjeren za učešće na Opštim izborima 2022. godine, pa se ovakvi oglasi i cijene kao promocija političkog subjekta.

Podnositelj žalbe je u smislu člana 19.9. stav (1) tačka t) Izbornog zakona BiH odgovoran za postupke kandidata u izbornom procesu, koje je predložio i koji su ovjereni za učešće na Opštim izborima 2022. godine, jer kao takvi predstavljaju političku stranku Socijalističku partiju – SP.

Centralna izborna komisija Bosne i Hercegovine ima odgovornost da ovakve objave spriječava i ne dozvoli vođenje plaćene izborne kampanje prije službenog početka izborne kampanje svim ovjerenim političkim subjektima.

Odredbom člana 16.4 stav 3. Izbornog zakona BiH propisano je da je zabranjeno vođenje plaćene izborne kampanje putem elektronskih i printanih medija ili bilo kojeg oblika plaćenog javnog oglašavanja, osim održavanja internih skupova organa i statutarne tijela političkih subjekata u periodu od dana raspisivanja izbora do dana službenog početka izborne kampanje.

Opisanim postupanjem žalilac je prekršio odredbe člana 16.4 stav 3. Izbornog zakona BiH („Službeni glasnik BiH“, br. 23/01, 7/02, 9/02, 20/02, 25/02, 4/04, 20/04, 25/05, 52/05, 65705, 77/05, 11/06, 24/06, 32/07, 33/08, 37/08, 32/10, 18/13, 7/14, 31/16, 41/20 i 38/22), pa mu je pravilnom primjenom odredbe člana 6.7 stav (1) i stav(2) tačka 1) i člana 19.9. stav (1) tačka 20 Izbornog zakona BiH izrečena novčana kazna u iznosu od 3.000,00 KM, koja kazna je minimalna novčana kazna za navedeni prekršaj.

Dakle, pobijanom odlukom žalitelju je izrečena minimalna novčana kazna, jer je povreda učinjena nakon što su stupile na snagu Izmjene i dopune Izbornog zakona Bosne i Hercegovine, koje je svojom Odlukom nametnuo Visoki predstavnik za Bosnu i Hercegovinu (Sl. glasnik BiH, br. 51/22 od 2. avgusta 2022. godine), a izmijenjenom odredbom člana 19.9. stav (1) Izbornog zakona BiH, propisane su strožije novčane kazne za ovaj i slične prekršaje (od 3.000,00 do 30.000,00 KM).

S obzirom na navedeno, po ocjeni ovog vijeća, pobijana odluka Centralne izborne komisije Bosne i Hercegovine je pravila i zakonita, a žalba neosnovana, pa je istu, primjenom odredbe člana 81. stav 1. Zakona o upravnim sporovima Bosne i Hercegovine (Sl. glasnik BiH br. 19/02 do 74/10) valjalo odbiti.

**PREDSJEDNIK VIJEĆA
S U D I J A**

Sreto Crnjak